



Broj: 03/1-50-14-7-31/13

Sarajevo, 18. 11. 2013.

PREDMET: Informacija o posjeti članova Zajedničke komisije za odbranu i sigurnost BiH Državnom zboru, Ministarstvu odbrane i Vojski Republike Slovenije 11. i 12.11.2013.

Članovi Zajedničke komisije za odbranu i sigurnost BiH i Komisije za izbor i praćenje rada Agencije za prevenciju korupcije i koordinaciju borbe protiv korupcije Parlamentarne skupštine BiH u periodu od 11.11. do 13.11.2013. posjetili su Državni zbor Republike Slovenije, Ministarstvo odbrane i Vojsku Republike Slovenije.

U odvojenim susretima sreli su se s predstavnicima Odbora za odbranu i Mandatno-izborne komisije Državnog zbora Republike Slovenije, predstavnicima Ministarstva odbrane i Vojske Republike Slovenije te Komisije za sprečavanje korupcije Republike Slovenije.

U delegaciji Zajedničke komisije bili su: predsjedavajuća Dušanka Majkić, zamjenica predsjedavajuće Borjana Krišto, članovi Komisije Beriz Belkić i Krunoslav Vrdoljak, parlamentarni vojni povjerenik BiH Boško Šiljegović, sekretar Zajedničke komisije Ljiljana Milićević i stručni savjetnik Željko Grubešić.

11.11.2013. Posjeta Državnom zboru Republike Slovenije

Tokom sastanaka s predstavnicima Odbora za odbranu Državnog zbora, koju je predvodio predsjedavajući Jurša Franc, članovi Zajedničke komisije razgovarali su o pozitivnim praksama u demokratskoj kontroli u oblasti odbrane i sigurnosti, s posebnim akcentom na pitanja budžeta za odbranu, zatim o učešću pripadnika oružanih snaga u dvije operacije podrške miru, pomoći civilnom stanovništvu prilikom elementarnih nepogoda, te sistemu javnih nabavki u sektoru odbrane.

Također, razgovarano je i o nadležnostima parlamenata i njihovih radnih tijela nad radom agencija koje se bave sprečavanjem korupcije, kao i percepciji javnosti o korupciji u Bosni Hercegovini i Sloveniji.

12.11.2013. godine

Članovi Zajedničke komisije za odbranu i sigurnost BiH i Komisije za izbor i praćenje rada Agencije za prevenciju korupcije i koordinaciju borbe protiv korupcije Parlamentarne skupštine BiH posjetili su, 12.11.2013., Komandu 1. brigade Vojske Republike Slovenije i Ministarstvo odbrane Republike Slovenije.

Tokom posjete komandi 1. brigade Vojske Slovenije, komandant Brigade brigadir Miha Škerbinc upoznao je goste iz PSBiH sa strukturom brigade, aktivnostima koje provodi u operacijama podrške miru te pomoći civilnom stanovništvu u slučaju elementarnih nepogoda.

Brigadir Škerbinc je u svojoj prezentaciji posebno istakao štetnost "birokratizacije" vojske te je kroz iskustvo brigade kojom komanduje zaključio da vojska mora znati misiju i zadatke te da je nužno u reorganizaciji, koja je uvijek poželjna, osloboditi se "fikusa", jer je to skupo i neproduktivno za vojnu strukturu. Istakao je nužnost regionalne saradnje i to saradnje na novim osnovama u kojoj će svaka zemlja biti u prilici da prezentira ono što je dobro i ono što je čini partnerom. Potrebno je što prije operacionalizirati inicijative jer u regionalnoj saradnji zemalja Zapadnog Balkana i JI Evrope je propušteno puno.

Delegacija PSBiH posjetila je i Ministarstvo odbrane Republike Slovenije, gdje su s državnim sekretarom Zoranom Klemenčičem i predstavnicima Direktorata za odbrambenu politiku Republike Slovenije razgovarali o bilateralnoj saradnji dvije zemlje na polju odbrane, iskustvima u planiranju vojnog budžeta i vođenju kadrovske politike u oružanim snagama. Državni sekretar Klemenčič je bilateralnu saradnju BiH i Slovenije na polju odbrane ocijenio vrlo dobrom. Istakao je posljedice ekonomske krize na budžet odbrane Slovenije koji je od 2008. godine neprekidno u padu.

Prezentacije o stanju u Ministarstvu odbrane Slovenije imali su predstavnici Direktorata za odbrambenu politiku.

Filip Tunjić, savjetnik u Direktoratu, govorio je o pregledu važnijih aktivnosti u bilateralnoj saradnji Bosne i Hercegovine i Slovenije u oblasti odbrane i sigurnosti. Mateja Žitnik, pomoćnica ministra, prezentirala je strukturu budžeta za odbranu Ministarstva odbrane R Slovenije. Pukovnik Branko Podbrežnik i Borko Obradović iz Odjela za personal predstavili su kadrovsku problematiku sektora odbrane u Republici Sloveniji.

Brigadir Dragan Bavčar, zamjenik direktora Direktorata za odbrambenu politiku, vodio je u ime Direktorata razgovor o navedenim temama. Naglasio je da budžet za odbranu u iznosu od 1% GDP-a nije dovoljan i da uzrokuje brojne probleme u dijelu koji prati opremanje Vojske Slovenije. Brojni projekti su stali ili su u zastoju, ali je to, prema njegovim riječima, realnost od koje se ne može pobjeći.

Naglasio je značaj blagovremenog planiranja i postupanja Vojske Slovenije tokom vanrednih situacija, posebno onih koje se odnose na elementarne nepogode.

Članstvo u NATO-u je obaveza i to košta, ali svaka zemlja konačno diktira kojom će dinamikom deklarirati svoju sposobnost i mogućnosti. I u Ministarstvu odbrane Republike Slovenije nezadovoljni su strukturom budžeta za odbranu čijih 70% ide na plaće. To je

daleko od željenog, ali ekonomska kriza diktira uslove u kojima će i Vojska Slovenije morati odustati od postavljenih ciljeva.

Nakon prezentacija, članovi Zajedničke komisije za odbranu i sigurnost BiH vodili su razgovor s predstavnicima Ministarstva odbrane Republike Slovenije tokom kojeg su domaćini dali brojne komentare i izrazili spremnost za još osmišljeniju i obostrano korisniju saradnju s predstavnicima odbrambenog sektora Bosne i Hercegovine.

Predsjedavajuća Zajedničke komisije

Dušanka Majkić

Prilog:

- Prezentacije Direktorata za odbrambenu politiku
Ministarstva odbrane Republike Slovenije